



Sabtu, 02 Desember 2023
Ogen: Filemon 1:15-16



"Senina I bas Kristus"



Ersenina entah erturang perlu kel i jaga i bas hubungan perkade-kaden. Entah kin e ersenina-erturang erkiteken sada nande-sada bapa bage pe ersenina-erturang erkiteken hubungan si i jalin alu mehuli.

Rasul Paulus si nuratkan bahanta enda man Filemon ngatakan maka dirina e me senina i bas Kristus subuk man perpulungen-perpulungen, man si Timotius bage pe man si Filemon. Pengatakan Rasul Paulus kerna dirina e me senina i bas Kristus gelah tergejap dengen teridah maka kiniersadaan e labo kiniersadaan si biasa tapi kiniersadaan si irakut i bas Kristus. Kiniersadaan si irakut e teridah megegeh dengen paguh. i bas ayat 7 tangkas kel kalimat si ibelasken Paulus kerna dirina e me senina i bas Kristus. (*O seninangku si kukelengi, kekelengenndu e erbahanca ateku malem dengen mpegegehi aku! Kerina anak-anak Dibata enggo ermeriah ukur ibahanndu*). Kalimat o senina si kukelengi ncidahkan maka hubungan si i jalin alu mehuli nadingken bekas si mehuli ka. Rasul Paulus ngakui si Erguna e me anak i bas kiniteken gelah Timotius bage pe Filemon ngaloken ia bagi seninana (si Erguna e me sekalak budak sikiam arah rumah tuanna nari jenari jumpa ia ras Rasul Paulus; kenca ras Paulus maka i tandaina Dibata dengen ialokenna keselamatan).

Hubungenta selaku ersenina-erturang subuk sada nande-sada bapa banci saja kurang sikapna. E maka wari enda iajuk kita njagai hubungan ersenina-erturang gelah tetap sikap dengen maba keriahen man banta bage pe man keluarga. Ngasup min kita ngatakan bage pengatakan rasul Paulus nandangi sekalak budak si kin labo i tandaina e jadi seninana. Si enda banci jadi erkiteken kiniersadanta ras Kristus. Senina i bas Kristus e me dalanta ngaloken senina-turangta alu mehuli.